




冊府元龜

卷之四百八十五
至八十五



13
849
160



冊 4 3
號 849
卷 160



冊府元龜

淮南李嗣京參芻

西極文翔鳳訂正

豫章黃國琦較釋

邦計部 二

經費

周官太宰之職以九式均節財用又置國用必於歲之抄量入以為出此邦家經費之制也蓋夫富有諸憂維御羣品必慎財賦以均用度若乃兵戎祭祀之給祿廩賜予之數乘輿之奉養庶事之供擬固亦有

嘗制矣其或觀風展義舉時巡之典陳師鞠旅揚天
討之威或勁虜來降遣將以臨塞或敵國授首勞師
以行賞斯皆嘗限之外厥費寢廣以加水旱為沴饑
饉荐臻於是乎稽防救之術為裁損之策去其不
取其有餘以至推振廩之仁遣墾田之議雖恩繇人
主而責成有司歷代之云為皆可觀矣

漢高祖平項羽天下以定民亡蓋藏無物可蓋藏自天子

不能具醇駟醇不雜也無色醇之駟謂駟馬雜色也而將相或乘牛車

以牛駕車也帝於是約法省禁輕田租什伍而稅一量吏

祿度用以賦於民纒取而山川園池市肆租稅之入

自天子以至封君湯沐邑皆各為私奉養不領於天

子之經費言各收其所賦稅以自供不入國朝之倉廩府庫之經常也漕轉關東

粟以給中都歲不過數十萬石

武帝時驃騎將軍霍去病仍再出擊胡大克獲仍頻也

渾邪王率數萬眾來降渾音胡昆反於是漢發車三萬兩

迎之一兩一乘既至受賞賜及有功之士費凡百餘鉅萬

先是胡降者數萬人皆得厚賞衣食御給縣官仰音牛向

切縣官不給給是也天子仍損膳解乘輿賜出御府禁

藏以澹音膳之其後大將軍衛青及去病大出擊胡賞

賜十萬金軍馬死者十餘萬匹轉漕車甲之費不與

焉與讀是時財匱匱財戰士頗不得祿矣

元封中武帝北至朔方東封泰山巡海上旁北邊以

歸旁音步所過賞賜用帛百餘萬匹錢金以鉅萬計

皆取足大農

後漢章帝元和中穀貴縣官經用不足朝廷憂之尚

書張林上言穀所以貴由錢賤故也可盡封錢一取

布帛為租以通天下用又言食之急者雖貴人不得

不須官可自鬻又宜因交陞益州上計利往來市珍

寶收采其利武帝時所謂均輸者也於是詔諸尚書

通議尚書朱暉奏據林言不可施行事遂寢後陳事

者復重述林前議以為於國誠便帝然之有詔施行

暉復獨奏曰王制天子不言有無諸侯不言多少食

祿之家不與百姓爭利今均輸之法賈販無異鹽利

歸官則人下窮怨布帛為租則更多姦盜誠非明主

所當宜行帝卒以林等言為然

順帝永建元年令安定北地上郡及隴西金城嘗儲

穀令周數年

永和元年以西羌反叛二十年餘兵連師老軍旅之

費三百二十餘億

六年詔貸侯王國租以歲

漢安二年詔貸王侯國租以歲

桓帝延熹五年八月詔減虎賁羽林住寺不任事者

半奉勿與冬衣東觀記曰以軍師水旱疫病帑藏空虛虎賁羽林不任事者住寺減半奉

據此謂簡選疲弱不勝軍事者留住寺也是年十月假公卿以下奉又換

王侯租以助軍糧出濯龍中藏錢還之

八月段紀明為護羌校尉上言伏計永初中諸羌反

叛十有四年用二百四十億永和之末復經七年用

十八餘億費耗若此猶不誅盡

魏齊王正始元年秋七月詔曰易稱損上益下節以

制度不傷財害民方今百姓不足而御府多作金銀

雜物將奚以為今出黃金銀物百五十種千八百餘

斤銷冶以供軍用

晉明帝太寧元年以軍國饑乏調刺史以下米各有

差

後魏道武天興五年帝聞姚興將寇邊庚寅大簡輿

徒詔并州諸軍積穀于平陽之乾壁

明元泰常三年九月詔諸州調民租戶五千石積於

定相冀三州

宣武正始元年九月詔緣淮南北所在鎮戍皆令及

秋播麥春納粟稻隨其土宜水陸兼用必使帝無餘

力比其來稔令公私俱濟也

後周太祖初爲魏相創制司倉嘗辦九穀之物以量國用國用足蓄其餘以待凶荒不足則止餘用用足則以粟貸人春頌之秋斂之

隋高祖開皇九年陳平帝親御朱雀門勞凱旋師因行慶賀自門外夾道列布帛之積達於南郭以次頒給所費三百餘萬段十一年江南又反越國公楊素討平師還賜物甚廣其餘出師命賞亦莫不優隆煬帝大業初戶口益多府庫盈羨及帝將事遼碣增置軍府歸地爲兵自是租稅之入益減矣

唐高祖平京師傾府藏以賜勲人既而又患國用不足太原人劉義節進計曰今義師數十萬並在長安樵貴而布帛賤若伐街衢及苑中之樹爲樵以易布帛歲取數萬匹立可致也又藏內繒絹疋皆有餘軸之使申裁取剩物以供雜費動盈十餘萬段矣高祖並從之大收其利

玄宗開元十六年勅曰年支和市合出有處官既酬錢無要率戶如聞州縣不配有家率戶散科費損尤甚設今給假亦慮隱藏宜令所司更申明格勅應欲反配須審料度所有和市各就出處

二十六年正月制長安萬年兩縣各與本錢一千貫收利供驛仍付雜驛

三月乙酉河南雒陽兩縣亦借本一千貫收利充人使課役

肅宗乾元元年四月庚午勅諸司諸使支一物已上商量減省三分之二以兩京初收務令節儉

代宗廣德二年九月戊戌諸道稅地錢物使左僕射裴冕請進百官俸祿二萬貫助糶軍糧許之

永泰元年冬郭子儀率廻紇兵大破吐蕃詔稅百官錢市絹十萬匹以賞廻紇時師旅荐興急於饋運百

僚上表請納職田充軍糧許之

大曆二年九月吐蕃寇靈州命有司運米二萬石供靈州軍是年冬率城百官士庶錢充朔方軍糧其六軍兵士不存此限九年五月乙丑勅曰四海之內方叶大寧西戎無厭獨阻王命不可忘戰尚勞事邊朕頃以兵革之役軍國空耗躬率節儉務勸農桑上玄儲體仍歲大稔益用大愧不知其然雖屬此人和近於家給而邊穀未實戎備猶虛因其天時思致豐積將設平糶以之饋軍然以中都所供內府不足粗充嘗入之數豈濟倍餘之收其在方面蓋臣成茲大計

共佐公家之急以資塞下之儲應諸道每歲皆有防
秋兵馬其淮南四千人浙西三千人魏博四千人昭
儀二千人成德三千人山南東道三千人荆南二千
人湖南三千人山南西道三千人劍南西道三千人
劍南東川二千人鄂兵一千五百人宣歙三千人福
建一千五百人其嶺南江南浙西浙東等亦合准例
恐路遠往來增費各委本道節度觀察使都團練等
使每年當使諸色雜錢及廻易利酒贖錢物每人
計二十千每道各據所配人數都計市輕貸送止都
左藏庫貯納充別勅和糴用並不得尅當將軍士衣
糧充數仍以和收送畢

德宗大曆十四年正月卽位閏五月丁亥內田宅使
上言州府有官租萬四千餘斛上令分給所在以爲
軍儲十二月己卯詔曰凡財庫皆歸左藏庫一用舊
式每歲於數中擇精好之物三五十萬匹進納大盈
庫而度支先以全數聞

建中四年討李希烈時李燧李懷光李抱真李芘四
節度之兵屯於魏縣李晟退次易州李勉陳少遊劉
洽哥舒曜等屯於淮汝之間神策并劍南東西二道
浙西荆南江西湖南黔中領南沔鄂等道之兵皆進

臨賊境諸道行營出其境者糧料皆仰給度支謂之
食出界糧又於諸軍各以臺省官一人司其供億謂
之糧料使帝尤卹軍士每出境者加給酒肉本道之
糧又留給妻子凡境一人兼三人之糧由是將士利
之纔進君逾境以規供費故諸軍月費錢一百三十
餘萬貫判度支侍郎趙贊以常賦不足用乃請採蓮
州白銅鑄大錢以一當十權其輕重又請置大田天
下人田計其頃畝官收十五之一擇其上腴樹桑環
之公田公桑自王公至於匹庶差借其力得穀絲以
給國用詔從其說贊熟計之自以爲非便皆寢不下

請行常平稅竹木茶漆之法

興元初李晟爲神策行營節度使時李懷光叛德宗
再幸梁州初無芻藁乃令簡較戶部郎中張彧假京
兆尹擇官吏以賦渭北畿縣不數日芻糧皆足後爲
副元帥討朱泚時渭橋先積米鹽十餘萬斛度支方
運以備懷光軍晟又密疏以謂近畿雖乘兵亂尚可
賦歛寇盜未滅宿兵曠時人廢耕桑又無儲蓄非防
微制勝之術也帝深納之至是守禦益固軍不乏食
貞元元年自春大旱麥枯死禾無苗度支奏京師經
費及關內外征討士馬月須米鹽五十三萬石錢六

十萬貫草三百八十三萬圍春冬衣賜元日冬至立
仗賜物不在其中時漕江東租賦百餘萬貫在江陵
度支主吏宋棲桐無部置遇火焚之國用益窘關中
百姓蒸蝗曝颺去翅足而食之人心大恐

二年十月度支奏京兆河南河中同華陝虢晉絳鄜
防卅延等及州府秋夏兩稅青苗等物悉折糶粟麥
所在儲積以備軍食京兆兼給錢收糶每斗于時估
外吏加十錢納于太倉詔可其奏自是每歲行之以
贍軍

十一月度支奏請于京兆府折明年夏秋稅錢二十

二萬四千貫文又請度支給錢添成四十萬貫令京
兆府今年內收糶粟麥五十萬石以備軍食詔從之
十二月度支使奏先准勅以河中兩地鹽充諸軍收
城將士賞錢自權法不行旅商頗絕請一切罷之其
所欠賞錢待江淮鹽利續至即給從之

三年閏五月度支奏請浙江東西節度使韓滉自建
中年已後供軍資費賞設等每年續加當錢六十一
萬六千貫准今年五年五日勅近日甲兵止息無別
徵求此是嘗稅先有成例宜令浙西觀察使白志貞
浙東觀察使皇甫政各據道本元額依舊每年兩稅

徵收發遣其錢物到別庫收貯每有給用皆先奏取進止其錢舊例每年六月舉徵如秋限送納今京西歸旅頗衆經用尤多望令依稅限納市經貨送上都從之

四年二月詔以中外給用除陌及關官俸外官一分職田停額內官俸及刺史執刀司馬軍事等錢令實參專掌之以給在軍京文武官俸料先是京兆俸薄多不自贍帝特命有司厚其月給自是京官益重頗擾裕焉初除陌錢隸度支帝以度支自有兩稅及鹽鐵糴酒錢物以充經費是錢宜別貯之給京官俸料

之餘以備他用自此戶部別庫稅歲貯錢物僅三三萬貫京師俸料所費不過五十萬貫其京外和糴物價及度支給諸軍冬衣或闕悉以是錢充之他用之外常貯僅二百萬貫國計賴焉是年經原節度劉昌與隴右節度李元諒於涇州及良原收軍田粟數萬石初將劉獲昌遣兵數千屯於潘原以禦藩寇自是邊軍頗有儲積

八年五月以都官郎中鄭克鈞爲靈夏二州運糧使吐蕃之圍靈州軍食絕及吐蕃稍却鈞自夏州以牛馬糴運米六萬餘斛致靈州度支又於勝州沂河運

雲朔米萬餘斛是秋雲州亦有積年穀稻數萬斛人心頗固

十月以西北邊穀錢詔令度支增價和糴以實邊儲凡積米三十萬斛是年裴延齡爲戶部侍郎判度支奏請令京兆府以兩稅青苗錢市草一百萬圍送苑中宰相陸贄趙憬議以爲若市送百萬圍草卽一府百姓自冬歷夏般載不了百役供應須悉停罷又防奪農務請令府縣量市三二十萬圍各貯近處時要卽支用

九年五月福建觀察使福州刺史王柳奏諸州並設軍額防虞役使更置執刀甚爲煩費旣垂簡要又給資糧況臣本道頻遇水旱百姓艱乏職貢或闕臣自到官已訖停其管諸州並請停罷其資糧等望借臣充當管軍資所要待年豐人戶歸復卽收送度支以禪國用制曰可其資糧二年後令戶部准停減例收管諸州府執刀亦宜省罷其資糧委戶部徵收
憲宗元和四年三月辛未靈武節度使范希朝奏請於太原防秋官健中以六百人衣糧充給沙陁突厥從之

六年十二月辛未勅黔中水災之後又宸敘初安如

間軍府之間每事整竭俾其存濟須有優矜其涪州
緣屬荆南有供荆南節度錢二千四百貫令隨本州
割還黔府兼於涪州送省錢三千八萬貫文內更取
一千五百貫添賜黔府見在將士軍資

七年七月戶部侍郎判度支盧坦奏今年冬諸州和
糴貯備粟澤潞四十萬石鄭滑易定一十五萬石河
陽一十萬石太原二十萬石靈武七萬石夏州八萬
石振武豐州鹽州各五萬石凡一百六十萬石以今
秋豐稔必資蓄備其澤潞易定鄭滑河陽委本道差
判官和糴各於時價每斗加十文所冀人知勸農國
有常備從之

八年六月景戌以東都留守韓皋爲簡較吏部尚書
兼許州刺史御史大夫充忠武軍節度等使勅以陳
許二州經水滂賜皋綾絹布葛十萬端疋以佐軍資
備宴賞

十一月癸酉昭義節度使鄒士美奏請以其衆鎮于
臨雒就食

十年十一月癸亥詔以內庫繒絹五千萬疋付左藏
庫以供軍

十一年九月己丑勅寇賊未平國用茲廣若加賦歛

重因黎元行權取濟自今已應內外支用錢宜每貫除墊陌外量抽五十文仍於本道本使據數逐季收計其諸道錢便綱部送副度支收管隨貯納以備軍須賊平後則依嘗制從有司之請也

十一月以內庫錢五十萬貫出付度支供軍十二年正月甲申鹽鐵轉運使王播奏伏以軍興之時在繫財賦國用之本出於江淮頃者劉晏掌領鹽鐵租庸每自巡按至於錢穀利病州縣否臧隨以上聞使得釐革臣緣在城務重不獲躬行伏望遣臣副使程昇特以詔命出巡江淮其諸州府上供錢米如妄託水

旱輒有破除伏請委程昇一切勘貴聞奏其度支戶部并臣當司合送上都行營錢物并令懇切催促其遠年逋欠亦委具可徵之數聞奏從之因令昇與淮南浙東宣歙江西河南嶺南桂管福建等道觀察使計會各臧嘗用去浮費取其羨助軍是月壬辰詔出內庫納絹布綿共九十萬端匹銀五千兩付度支饋運九月戊子詔以內庫羅縠及犀王金帶之具及婦人首飾送度支令歸其直

十三年二月壬午內出玳瑁琉璃四百隻犀帶具五百副令度支出售進直

六月內庫出絹三十萬匹錢三十萬貫付度支給軍用

十四年二月乙卯出內府錢帛貫匹共一萬付度支給軍用

十五年五月壬寅朔癸卯詔曰比緣用兵歲久初息干戈百役所資國用多闕不可更加賦稅重擾疲人參酌權宜事貴通濟自今已後應內外支用錢宜於天下收兩稅鹽利權酒稅茶及職掌人課料等錢並每貫除舊墊陌外量抽五十文委本道本司本使據數逐季收計其諸道錢使差綱部送並付度支收等

待一二年後國用稍充即依舊制其京百司俸科文官也准別勅每月量抽脩文宣王廟不可重有除減武官所給校簿亦不在抽限

七月乙卯勅自今已後新除觀察節度使到任日具見在錢物斛斗器械數分折以聞

穆宗長慶元年二月浙東奏准詔停老弱官健收衣糧

四月己丑河南尹韋貫之請去以年夏末至今年夏初供館驛外殘錢一萬三千五百八十貫草九萬五百八十束代百姓旗元和十一年至十五年逋欠及

今年夏稅從之

十二月乙亥勅諸道州府每年徵納兩稅除送上都外留州留使錢綠草賊未殄費用滋廣兩稅之外雜議加徵然其饋運之間又須得濟諸道留使錢宜令長吏於諸色給用中每貫量減二百文以資軍用事平之後即任仍舊壬午出內藏庫五萬貫付度支以備軍湏

二年正月內出緡帛八萬匹付度支以助軍資

四日辛未詔曰頃以寇賊未殄費用滋廣先有詔勅於諸道留州留使給用錢中每貫量抽二百文今兵戎已戢經費有常其抽錢宜從今年四月十一日已後停切令官吏所在知委不得妄有增減

七月以討沐州李宥內出綾絹五十萬匹付度支以充軍用

敬宗以長慶四年正月即位三月大赦制官禁經費及乘輿服膳委所司起今年三月其本色物價及水陸脚價一半委度支收管一半使任本州收充助貧下戶闕額稅錢

天曆二年五月辛巳勅如聞度支近年請諸色支用常有欠闕今又諸軍諸使衣賜支遣是時湏有萬圓

使其濟辦宜量賜絹及紬一萬匹以戶部物充

七月壬辰戶部侍郎崔元畧進准宣索見在左藏庫
挺銀及銀器十萬兩金器七千兩舊制戶部所管金
銀器悉貯於左藏庫時帝意欲使於賜與故命盡輸
內藏

文宗太和元年三月鹽鐵使王播進停減鹽鐵官吏
課料絹一萬六千二百匹

六月司空兼門下侍郎平章事判度支裴度進金六
十八挺

十一月庚寅勅李寰下將士衣糧舊准神策軍例支

給今初移鎮五令度支且准舊例處分待蒼景事平
後仍委條流聞奏

二年十月辛酉勅武寧軍士馬悉在行營不同管日
舊賜綾絹二萬匹仍委度支逐使支送

四年五月戊子罷度支每年於劍南西川織造年支
綾羅錦等共八千一百六十七匹張端數內五百事
九年春正月甲戌中書門下奏太倉見在粟二百六
十萬八百五十四石並請留充貯備不承別勅不在
給用之限如有特勅支用以須覆奏從之

七月乙巳戶部尚書判度支王璠奏東渭橋每年北

倉收貯漕運糙米一十萬石以備水旱今累年計貯三十萬石請以今年所運者換之自是三歲一換率以爲嘗則所貯不陳而耗蠹不作許之

開成元年正月一日赦詔其京兆府附一年所支用錢物斛斗草等並勒鹽鐵使以開成元年直進綾絹充還辛酉鹽鐵使左僕射令狐楚請以罷修曲江亭子絹一萬三千七百匹廻脩尚書省

二月度支奏每年供諸司并畿內諸鎮軍糧等計粟麥一百六十餘萬石約以錢九十六萬六千餘貫糴之畿內百姓每年納兩稅見錢五十萬貫約以粟麥

二百餘萬貫糴之是度支糴以六十而百姓糴以二十五農人賤糶利歸商徒度支貴糶賄行黔吏今請以度支貴糶錢五十萬貫送京兆府充百姓一年兩稅勒二十三縣代緡輸粟八十萬石小麥二十萬石充度支諸色軍糧則開成三年以後似每歲放百姓一半稅錢又省度支錢一十萬貫勸農減費物理昭然仍請百姓廣開田畝更不加稅行之有節富庶可期詔付京兆府夏季以前先造戶帖務使平允凡折納之術行於豐年斯惠農務苟非豐登人用苦之蓋輸緡易而輸粟難也

武宗會昌元年赦日應州縣等每有過客衣冠皆求應接行李苟不供給必致怨尤刺史縣令務取虛名不惜百姓夫蓄皆配人戶酒食科率所繇令虛通額狀招領價錢又陳設之物遍擾閭里蠹政害人莫斯為甚宜委本道觀察使條流量州縣大小及道路要僻各置本錢逐月收利前觀察使刺史前任臺省官不乘館驛者許量事供給其前便以留州留使及羨餘錢充每至季終申觀察使不得輒配所由人戶並限赦書到後一月內處置訖聞奏虛立名目妄破官錢依錢科配並向入已在法贓處分縣令已下親故以家口同行者並須以料錢供給不得擅配店戶祇供其所在食估切宜禁斷如有犯者並以贓論仍委御史臺及所在巡按嘗加察訪

懿宗咸通五年五月丁酉詔如聞湖南桂州是嶺路係口諸道兵馬綱運無不經過頓遞供承動多差配凋傷轉甚宜有恩宥潭桂兩道各賜錢三萬貫文以助軍錢以充館驛息利本錢其江陵江西鄂州三道比於潭桂徑配稍簡宜令本道觀察使諸冥閑劇准此例與置本錢

七月壬子延資庫使夏侯孜奏鹽錢戶部先積欠當

使咸通四年已前延資錢絹三百六十九萬餘貫足
內戶部每年合送錢二十六萬四千二百八十五貫
足從大申十二年至咸通四年九月已前除納外欠
一百五十萬五千七百一十四貫足當使緣戶部積
欠數多先具申奏請於諸道州府場院合納戶部所
收八十文除陌錢內割一十五文屬當使自收管勅
命須行送納稽緩今得戶部牒稱所收除陌錢除錢
絹外更有諸雜貨物延資庫徵收不便請起今年合
納延資庫錢絹一時便足其已前積欠候物力稍充
積漸堙填其所割十五文錢即當司仍舊收管又緣

累歲已來嶺南用兵多支戶部錢物當使不欲堅論
舊欠請依戶部商量合納今年一年額色錢絹湏足
明年即依舊制三月九月兩限送納畢其已前積欠
仍令戶部自立填納期限者勅旨依之

八年九月丁酉延資庫使曹確奏戶部每年合納當
使三月九月兩限絹二十一萬四千一百匹錢五萬
貫自大中八年已後至咸通四年積欠五十萬五千
七百餘貫足前使杜棕申奏起請咸通五年正月已
後於諸道州府場鹽院合送戶部八十文除陌錢內
割十五文當使收管以填積欠續據戶部牒稱州府

除陌錢有折色零碎請起減通五年所合送延資庫錢絹逐年兩限須足其餘陌十五文當司仍舊收管前使夏侯攷具事由申奏且請依戶部論請期限其減通五年錢絹戶部已送納自六年至八年其錢絹依前不旋送納又積欠三十六萬五千五百七十貫文者伏以所置延資庫初以備邊為名至大中三年始改今號若財物不充則名額虛設當置制之時所令三司逐年分改減送當使收管元勅只有錢數但令本司減割送庫不定色目以此因循漸隳舊制年月既久積欠轉多既無計以徵收乃指色以取濟稍

稱備邊名號得遵元勅指揮乃割戶部除陌八十文內十五文收管及戶部請逐年送庫具票從今覽積欠又多終慮不及期限臣今酌量請諸道州府場監院合送戶部錢絹內分配令勒留下合送納延資庫數目令本處別為綱運與戶部綱同送上都直納延資庫則戶部免有逋懸不至累年積欠從之

十月丙寅戶部侍郎判度支崔彥昭奏當司應收管江淮諸道州府咸通八年已前兩稅權酒及昔支米價并二十文除陌諸色屬省錢准舊例逐年商人投狀便換自南蠻用兵已來置供軍使當司在諸州府

場鹽錢猶有商人便換齎錢司便換文牒至本州府請領皆備諸州稱准供軍使指揮占留以此商人疑惑乃致當司支用不充乞下諸道州府場監院依限送納及給還商人不得託稱占留

昭宗乾寧四年同州節度使長春宮使韓建奏以京兆府於每年見徵賦內減四十萬貫充上供

梁太祖開平二年十一月兩浙節度使奏差使押茶貨往青州廻變供軍布衫段送納

後唐明宗天成元年四月制曰先皇帝運關外之資糧俱雜中之戎馬遂致百姓困弊不勝饋輓之勞今

則須爲制置令度支與總管司會定在京兵數據所供饋積貯京師其近畿糧儲可令諸軍就食其租庸司先將係省錢與人廻圖所供課利或爛茶弊物積年之後和本乾沒爲弊最深宜令盡底收納以塞侍門

八月乙未汴州奏兵額數廣稅物不多切慮年終供饋有關支郡舊管漕州伏乞却歸當道從之

三年三月三司使奏河陽白波鞏縣見有軍儲百萬餘斛草二百七十萬束

長興二年四月太子賓客裴臯上言以京師牛馬多

草價貴請畿內種禾者放地頭錢及甸服之內舟楫所通沿河置場買草每至春夏即官中出賣

三年十二月乙亥三司使馮贇奏奉聖旨賜內外臣僚節料羊計支三千口帝曰不亦多乎范延光奏曰供御厨及內史食羊每日二百口歲計七百萬餘口釀酒糯米二萬餘石帝聞奏歛容良久曰支費大過如何減省初莊宗同光時御厨日食羊二百口當時物論已爲大侈今羊數畝同帝故駭心

四年二月癸丑帝御中興殿樞密使范延光曰緣邊屯戍兵士人馬支費月計極多若春夏之交便有霖雨山水湍險軍無興舉之理應緣邊兵馬請移於近襄州郡以便芻糧從之帝因問延光內外見管馬數對曰見兵馬數管騎軍三萬五千帝撫髀歎曰朕從戎四十年太祖在太原時騎軍不過數千先皇與汴家二十年較戰自始至終馬數裁萬今有鐵馬三萬五千匹而不能使九州混一是吾養士卒練將帥之不至也吾老矣焉將柰何延光奏曰臣每思之國家養馬太多試計一騎士之費可贍卒五人養三萬五千騎抵十五萬步卒既無所施虛耗國力臣恐一年不易帝曰誠如卿言肥騎士而瘠吾民何負哉八

月賜侍衛親軍優給有差時月內再有頒給自茲府藏無餘積矣

十一年辛巳朱弘昭馬贊曰臣等自蒙重委計度國力盈虛而支給常若不足者直以賞軍無等買馬太多之弊也若不早為節限後將難濟宜嚴勅西北邊鎮守北後請禁止其來

閔帝應順元年正月洋州節度使孫漢韶上言於維谷路造倉舍三月計鳳翔西京留守王思同上言度支支供軍錢一千萬未帝即位改元清泰太后太妃出官中衣服器用簪珥之屬令主者陳于帝庭以助

勞軍也帝朝太后辭之不獲初三司計用費軍錢五十萬及率士庶房課搜索質兼貢物及二十萬兩宮知之故有斯助

二年六月甲申以邊軍儲運不給詔北百總管以河東諸州民戶有多積粟菽者量事抄借以益軍儲乙酉詔鎮州輸絹五萬匹於北百總管府博糴軍儲七月甲午北面總管言邊軍乏芻糧其安重勞巡邊兵士欲移振武就軍食從之

晉高祖初即位改元天福赦制曰悉力爲時罄財助國苟不推於恩命亦何示於賞酬自舉義以來應借

率人戶及經批括商旅資財錢物委所司明置文籍候平定之後當議給還

二年九月丁卯據度支奏應請假入覲省朝人皆是等第支賜茶藥自前委所司以諸進到者給今諸庫並無見在今後應有請假臣寮欲請權住支候有進到即依舊支賜從之

六年八月宣三司指揮鄴都瀆相貝博五州配買修軍管材料一萬五千間仍差工匠人夫共九千人充役

周廣順元實年五月內鄴都王殷言奉宣以去年諸倉羨餘斛斗留一萬石本府公使餘係籍管之

冊府元龜

淮南李嗣京叅閱

西極文翔鳳訂正

豫章黃國琦較釋

邦計部

濟軍

輸財

濟軍

兵法曰興師十萬日費千金又曰千里饋糧士有饑色蓋挈畚合糧周官之制振廩同食左氏所述自昔兵車之會資糈之給曷嘗不以宿飽為念哉由漢以

來或與戎整衆擊寇伐虜縣兵以深入堅壁而相持
飛輓所須乏絕是慮乃有良臣受任忠公匪懈經營
調法周濟用度俾無後爨之患以助惟揚之武克贊
茂勲輔成大業傳所爲公家之利知無不爲者也
漢蕭何爲丞相守關中時漢王與諸侯擊楚何輒以
便宜施行關中事計戶口轉漕給軍

後漢馮異爲征西大將軍討赤眉屯軍上林苑中時
百姓饑餓人人相食黃金一斤易豆五升道路斷隔
委輸不至軍士悉以果實爲糧光武詔拜南陽趙康
爲右扶風將兵助異并送縑穀軍中皆稱萬歲異兵

食漸盛

寇恂爲河內太守行大將軍事光武謂恂曰河內完
富吾將因是而起昔高祖留蕭何鎮關中吾今委公
以河內堅守轉運給足軍糧率厲士馬防遏他兵勿
令北渡而已光武於是復北征燕代恂移書屬縣講
兵肄射伐淇園之竹爲矢百餘萬淇園衛之苑多竹
篠也養馬二千匹收租四百萬斛以給軍
魏鍾繇漢末都督關中太祖在官渡與袁紹相持繇
送馬二千餘匹給軍太祖與繇書曰得所送馬甚應
其急關右平定朝廷無西顧之憂足下之勲也昔蕭

何鎮守關中足食成軍亦適當爾

夏侯淵為陳留潁川太守太祖與袁紹戰於官渡竹管軍校尉紹破使都督兗豫徐州軍糧時軍食少淵傳饋相繼軍以復振

杜畿為河東太守太祖西征至蒲坂與賊來渭為軍軍食一仰河東及賊破餘畜二十餘萬斛太祖下令曰河東太守杜畿孔子所謂禹吾無間然矣增秩中二千石

張既為雍州刺史太祖征張魯既別從散關入討叛氏收其麥以給軍食

任峻為騎都尉太祖每征伐峻嘗居守以給軍是時歲饑旱軍食不足羽林監潁川棗祇建置屯田太祖以峻為典農中郎將數年所在積粟倉廩皆滿官渡之戰太祖使峻典軍器糧運賊數寇欽絕糧道乃使二乘為一部十道方行為復陳以營衛之賊不敢近軍國之饒起于棗祇而成於峻

郭淮為雍州刺史明帝太和五年蜀出鹵城是時隴右無穀議欲關中大運淮以威恩撫循羌胡家使出穀平其輸調軍食用足轉揚武將軍

于禁為虎威將軍時張遼等與陳蘭梅成相持軍食

少禁運糧前後相屬遼遂斬蘭成增邑二百戶并前千二百戶

蜀王嗣爲西安圍都汶山太守時大將軍姜維每出北征羌胡出馬牛羊羶耗及義穀俾軍糧國賴其資遷鎮軍領郡

晉劉弘惠帝時爲南蠻較尉荊州刺史時益州刺史羅尚爲季時所敗遣使告急請糧弘移書贍給而州府綱紀以運道懸遠文武匱乏欲以零陵一運米五十斛與尚弘曰諸軍未之思耳天下一家彼此無異吾今給之則無西顧之憂矣遂以零陵米三萬斛給

之尚賴以自固

袁真爲西中郎將哀帝隆和元年進次汝南運米五萬斛以饋洛陽

朱序爲龍驤將軍監兗青二州軍事求鎮淮陰拜征虜將軍未行求運江州米一萬斛布五千疋以資軍糧孝武詔聽之加都督司雍梁秦西州軍事帝遣廣威將軍河南太守楊佺期南陽太守趙睦各領兵千人隸序又表求故荊州刺史桓石生府田一百頃并穀八萬斛給之

宋臧熹爲建武將軍臨安太守孫李高自海道襲廣

州路繇臨海熹資給發遣得以無乏

南齊蕭穎胄爲冠軍將軍西中郎長史東昏永元二年與梁王同謀起義兵加穎胄右將軍都督行留諸軍置佐吏先遣寧朔將軍王法度向巴陵穎胄獻錢二十萬米千斛鹽五百斛諮議宋塞別駕宗史獻穀二千斛牛二千頭換借富資以助軍費長沙等僧業富沃鑄黃金爲龍數千兩埋土中歷傳相付稱爲下方黃鐵莫有見者乃取之以充軍食

梁劉坦爲長沙太守行湘州事時高祖起義兵坦選堪事吏分請十郡悉發人丁運租米三十餘萬斛致之義師資其用給

陳孔奐爲黃門侍郎時北齊遣東方光蕭軌等來寇軍至後湖都邑搔擾又四方壅隔糧運不繼三軍取給唯在京師乃除奐爲貞威將軍建康令累時歲兵荒戶口流散勅敵忽至徵求無所高祖尅日決戰乃令奐多營麥飯以荷葉裹之一宿之間得數萬軍人且食紇棄其餘因而決戰遂大破賊

後魏韓麒麟爲冀州刺史慕容白曜攻東陽麒麟上義租六十萬斛并攻戰器械于是軍資無乏北齊盧勇初爲東魏揚州刺史孝靜武定二年卒年

三十二勇有馬五百疋私造甲杖六車遺啓盡獻之
朝廷

後周周惠達爲太祖行臺尚書大將軍府司馬太祖
出鎮華州留惠達知後事于時既定喪亂庶事多闕
惠達營造戎仗儲積倉糧間閱士馬以濟軍國之務
時甚賴焉

崔猷爲梁州都督時利州刺史崔士謙請援猷遣兵
六千赴之信州糧盡猷爲送米四千斛於是二鎮獲
全

唐宋王成器爲絳州刺史獻馬牛羊等助軍玄宗報

之曰塞草具腓秋風已勁張國容會軍實者孰先於
此乎家國之情助其費用周旋省覽以慰所懷

王難德爲左武衛大將軍安祿山反難德從哥舒翰
至潼關殺麾下叛胡數百人扈肅宗至靈武行在無
絹給賜難德進絹三千疋及金銀器

李齊運德宗時爲京兆尹京師尚陷賊李晟軍渭橋
齊運在擾攘中募人版築輓芻輦粟以應晟頗有勤
績

韓滉爲鎮海節度建中四年德宗行幸及歸京師軍
用既繁道路又阻關中饑饉加之以災蝗江南兩浙

轉輸粟帛府無虛月朝廷賴焉

田季安為魏博節度使時中官吐突承瓘領兵討王承宗季安亦出師以兵餉逆

李鄴憲宗時為淮南節度使元和十一年以軍興進絹三萬疋金五百兩銀三千兩以助軍十二年又進助軍絹三萬匹時朝廷以兵興國用不足命鹽鐵副使程昇乘驛諭江淮諸道俾助軍鄴以境內富貴乃大藉府庫一年所蓄之外咸貢於朝諸道以鄴為倡首悉索以獻自是王師無匱乏之憂

又元和十二年至自江南得供

軍錢一百八十五萬貫以進

王遂為宣歙觀察使進助軍錢三萬四千二百貫

皇甫鏐為戶部侍郎判度支元和十三年正月進錢

三萬貫

程昇為衛尉卿鹽鐵使進絹十萬疋並號羨餘

韓弘為汴州節度使元和十三年進絹五萬匹又十

四年王師討淄青弘進助平淄青絹二十萬疋

盧坦為劔南東川節度使在鎮三年後請收閩月軍吏糧料以助行營人多非之

李遜為陳許節度穆宗初方銳意討賊諸道發兵例於度支貸借唯遜出兵率先諸道賞賜犒宴備於當

軍朝論羨之故加簡較吏部尚書

元錫為宣州觀察使長慶元年進助軍綾絹一萬匹

弓箭器械共五萬二千事

楊元卿敬宗時為涇原節度使寶曆元年上言營田

收禾粟二十萬斛請付度支充軍糧文宗時為河陽

節度使奏請自出三月糧料自備行營

又云楊元卿為河陽節度

大和四年進粟四十萬以助有司經費

杜元穎文宗時為西川節度使太和三年奏發助軍

第一般匹段二萬匹到河陰縣

張惟清為涇原節度使太和五年進助邊粟麥合二

十萬

王淮為鹽鐵使大和五年五月進羨餘綾絹二十萬

匹凡十次

段侑為天平軍節度使觀察等使太和元年十月侑

奏請起今年發遣當管鄆曹濮三州兩稅榷酒等上

供錢十萬貫斛斗五萬石勅天平軍元和以前地本

殷實自分為三道十五餘年雖班詔勅竟未賦富殷

侑承兵戈之後當歉旱之餘勤力奉公謹身守法纔

及周歲已致阜安而又體國推忠率先入貢成三軍

奉上之志陳一境樂輸之心循省表章深用嘉歎所

奏依

王潛爲荆南節度使在任聚斂所至倉庫盈溢屬朝廷方討滄鎮以助軍爲名嘗賦獻之外進錢七十萬貫

張元仲爲幽州留後時徐人作亂請以弟元臯領兵伐叛懿宗不允乃進助軍米五十萬石鹽二萬詔嘉之

王鎰爲鎮州節度使僖宗中和二年進助太原軍士家口糧光啓元年又進扈衛戰馬五百匹

梁趙瑋唐昭宗天復元年徵爲同州節度留後時太

祖統軍岐下瑋在馮翊輸輓調發旁午道途俄而昭宗還長安詔徵入覲錫迎鑾功臣之號

開平二年七月湖南節度使馬殷奏天軍先與本道兵士同收復明州進賞犒將士錢十萬貫

七月魏博節度使羅紹威進絹三萬匹時虜寇臨汾諸將征討日聞其捷紹威進以備犒師之用

乾化元年十月北征密州奏助軍絹二千疋青州節度使進絹五千疋兗州進絹三千疋

後唐張全義爲河南尹莊宗同光二年五月進粟四萬石助軍

末帝清泰二年六月癸未樞密宣徽使進添都馬一百三十疋河南尹百匹時偵和北虜寇邊一日促騎車故有此獻欲表率藩鎮也

三年七月丁酉青州房知溫獻馬五千疋鄧州皇甫遇馬十匹錢千緡以助討伐辛丑鄆州王建立獻助軍錢千緡絹千疋粟五千斛馬二千疋

八月丙寅宿州刺史武從諫獻助軍錢五百緡復州刺史郭延魯貢錢五百貫馬十匹助征

晉高祖天復二年四月汴州楊光遠進助國錢二萬貫宋州趙在禮進助國絹三千疋錢二千貫陝府進

助國絹三千疋銀一千兩玉腰帶一條馬十匹

五月丁卯許州萇從簡進助國錢五千貫絲五千兩甲戌徐州安彥威進助軍錢五千貫綿絲六萬已卯

宋州趙在禮進助國茶三萬斤鄆州安審琦進助軍絹三千疋絲五千兩花纈五十匹銀器五百兩

七月秦州康福進國錢五千貫

八年甲午邠州安叔千進助軍馬五千疋

癸卯宋州趙在禮進大小麥一萬石同州符彥卿進助國銀一千兩船五隻

九月辛亥湖南馬希範進助大茶三萬斤丙辰荆南

高從誨進助國絹五千匹綿綺一百匹
西鎮州安重榮進馬三十疋
乙亥雄州刺史袁正辭進助國錢三萬貫

十一月甲寅前荊州節度李德瓌進馬三十匹
丁巳襄州安從進選馬二十疋
絹一千疋

十二月辛丑定州皇甫遇奏般軍糧八萬石
赴魏州乙巳楊光遠進助國錢一萬貫

三年正月壬戌昭義軍杜重威進助國馬二十疋
銀五百兩玉帶五條
戊辰鄆州安審琦進助國絲二萬兩
絹二千匹

二月戊寅徐州裴從簡進助國錢三千貫
同州符彥卿進馬三十疋
戊戌北京留守安彥威進助國馬二十五疋
絹一千疋
東京留守高行周進助國錢五千貫
又鎮州安重榮進助國絹六千疋
綿一萬兩
進州相里金進銀一千兩
錢一千貫

三月庚戌安州季金全進助國錢一千貫
茶三千斤四月戊戌楊光遠進草十萬束
粟三千石大豆二千石
白米三千石
壬寅襄州安從進助國茶一萬斤

五月西京留守李周進助國銀二千五百兩
九月許州進馬五十疋
劍五十口
銀裝鎗五十條
鎗

州安重榮進添都馬五十疋

十月鄜州安審暉晉州相里金定州皇甫遇進添都馬三十匹秦州康福邠州安叔千共進添軍馬七十疋

十一月晉昌李周進添都馬三十疋河府安審信進助國錢一萬貫青州王建玄進助國絹七千疋綿一萬兩銀三千五百兩金酒器一副滄州馬全節進助國絹三千疋綿三千兩絲八千兩添都馬二十疋兗州李從溫進助國錢五千貫安州李金全進助國錢三千貫甲子襄州安從進助國絹三千疋茶一萬斤

十二月陝府李從敏進絹二千疋綾五百疋小麥二千石同州符彥卿進助國錢一千貫絹一千疋戊戌湖南進助國銀一萬兩秦州康福進助國馬七十疋銀一千五百兩細布一千疋廷布五百疋

七年閏三月湖南奏差人押軍運糧米一萬石往襄州軍前進計四萬石

少帝以天福七年六月即位八年七月京兆府奏軍食不充左金吾衛上將軍皇甫立進助國粟三千石許州李從溫進粟一萬二千三十石

開運二年尚食副使鄭延祥自鄆州回齋新授節度

使馮暉表進馬三千三百五十匹駱馳五百頭糧草一百萬束衣甲器械一萬事件其馳馬器械請供奉官蕭處鈞先押赴闕糧草在靈武道收貯

是年鎮州杜重威進廳頭小底牽隴官共三千四十四人馬軍七百七十二人步軍一千七百七十二人馬八百疋衣甲器械旗槍共四十三萬事件並在本道

晉州安叔千進廳頭軍何彥溫已下一百人鞍馬器仗全

漢史弘肇爲侍衛使乾祐元年獻錢萬緡馬二十疋

以助供軍討叛也三年肇與鄴都留守各貢助軍緡萬匹字臣三司使各有貢物助軍

周符彥卿爲青州節度使太祖廣順二年車駕平定兗州彥卿進錦綵三千匹軍糧萬石

輸財

邦家所急食貨爲先雖屬之計臣亦成於民力焉西漢而下乃有迹在編民名恭著位屬戎車屢駕有蠲金之費歲穀不登無九年之蓄天子爲之旰食黎民由是阻饑于是乎發其私帑獻其井賦以助國用而歸之有司焉斯亦愛君憂國感於忠義者之所爲也

漢卜式齊人武帝時方事匈奴式上書願輸家財半助邊帝使使問式欲為官乎式曰自小牧羊不習仕宦不願也使者曰家豈有冤欲言事乎式曰臣生與人無所爭邑人貧者貸之不善者教之所居皆從式式何故見冤使者曰苟子欲何言子苟如此輸財必有所欲式曰天子誅匈奴愚以賢者宜死節有財者宜輸之如此而匈奴可滅也式歸牧田歲餘會渾邪等降縣官費眾倉府空倉粟所積也貧民大徙皆仰給縣官無以盡贍式復持錢二十萬與河南太守以給徙民河南上富人助貧者帝識式姓名曰是固前欲輸其家半

財助邊乃賜式外繇四百人

外繇役之外得復除四百人也

式又盡

復於官是時富豪皆爭匿財

匿藏也

惟式尤欲助費帝

於是以式終長者乃召拜式為中郎賜爵左庶長田十頃布告天下尊顯以風百姓

杜緩御史大夫延年之子緩為太常嗣建平侯元帝初即位穀貴民流永平中西羌反輒上書入錢數以助用前後數百萬

後漢王丹京兆下邳人家累千金光武時前將軍鄧禹西征關中軍糧乏丹率宗族上麥二千斛禹表丹領左馮翊稱疾不視事免歸

東海頃王肅安帝永初中以西羌未平上錢二十萬
元初中復上絹萬匹以助國費

張禹爲太尉封安鄉侯後連歲災荒府藏空虛禹上
疏求入三歲租稅以助郡國稟假詔許之

任城王崇順帝時羌虜數反崇輒上錢帛征邊費冲
帝初復上錢三百萬助山陵用度朝廷嘉而不受

宋徐耕晉陵延陵人爲平原令文帝元嘉二十一年
大旱民饑耕詣縣陳亂曰今年亢旱禾稼不登氓黎
饑餒採摛存命聖上哀矜已垂存拯但罄未久困殆
者衆米穀轉貴糴索無所方涉春夏日月悠長不有

微救永無濟理不惟元瑣敢憂身外麀鳴之求思同
野草氣類之感能不傷心糴得少米資供朝夕志欲
自竭義存分殮今以千斛助官賑貸此境連年不熟
今歲尤甚晉陵境內特爲偏枯此郡雖弊猶有富室
丞陂之家處處而是並皆保熟所失蓋惟陳積之穀
皆巨萬旱之所弊實鍾貧民溫富之家各有財寶謂
此等並宜助官得過儉月所損至輕所濟甚重今敢
自勵爲勸造之端實願拙水揚塵崇益山海爲言上
當時議者以耕比漢卜式詔書褒美以縣令
嚴成東海人孝武帝大明八年東土饑旱成與東莞

王道蓋各以穀五百斛助官賑恤

梁高祖天監七年以興師費用王公以下各上國租及田谷以助軍資

後魏任城王澄爲尚書孝文南伐留澄居守澄表請以國秩一歲租帛助軍資詔受其高平租

彭城王劭襲父勰封孝明初梁武遣將犯邊劭上表曰僞監游魂闕觀邊境勞兵兼時日有千金之費臣仰藉先資叨享厚秩思以埃塵用禪山海臣國封徐州去軍差近謹奏粟九千斛資絹六百疋國吏二百人以充軍用靈太后嘉其至意而不許之

虢陽王徽爲鎮軍將軍于時戎馬在郊王師屢敗徽以軍旅之費上助國絹二千疋粟一萬石以助軍用孝明不納

侯綱初爲太子中庶子迎孝明于東宮以功封武陽縣侯食邑二千戶後爲軍騎大將軍啓曰軍旅稍興國用不足求以封邑俸粟賑給怨人孝明許之

隋王辯字警畧馮翊蒲城人祖訓以行商致富魏世出粟助給軍糧爲假清河太守

唐彭惠通安州人貞觀十八年太宗征遼東惠通請出布帛五千段以資征人太宗嘉之比于漢之卜式

拜爲宣義郎

霍王元軌高祖子高宗調露二年二月率文武百官詣闕上表請各出一月俸料供軍以討突厥詔從之嚴震梓州監亭人祖父田農爲業以財於鄉里肅宗至德乾元以後震屢出家財以助邊軍授賜合州長史王府諮議參軍

郭子儀爲邠寧節度使代宗大曆八年十二月迴紇赤心賣馬一萬匹有司以國計不充計市六千匹子儀以迴紇前后立功不可阻其意請自納一年俸物充迴紇馬價雖詔旨不允內外稱之

羅紹威爲魏博節度使哀帝即位紹威進救接百官絹千疋綿三千兩

後唐郭崇韜莊宗同光中爲樞密使初在汴維稍通諸侯賂遺親友密規之崇韜曰予備位將相祿賜巨萬不俟他財以致富但以朱氏之日以賂遺成風今之方面藩侯皆梁之舊將吾主射鈎斬祛之怨也一旦革面化爲吾人堅拒其請寧先拒乎藏于私室無異公帑及莊宗將行郊禮有司計府庫闕勞軍錢崇韜首出積十萬貫以助郊祀

安重誨爲樞密使明宗三年五月以有事于中山進

馬三十疋助戎事藩侯郡守遂相次進之

張筠為左驍衛上將軍致仕長興元年十月進助軍粟五千石是月與元府奏軍府官共進助軍粟三萬三千石

鄭師文絳州人清泰末帝親征太原師文獻錢五千萬助西軍進討詔本州補教練使人

晉袁正辭初仕梁乾化貞明中歷飛龍沂州副使後唐清泰中進錢五萬貫尋領衢州刺史及高祖即位後獻錢五萬貫出典雄州辭以州在靈武西鄙處吐蕃部族之中不願適任進亦及如前方免其行少帝

開運元年加檢討司徒使與朝請二年助國錢三萬銀一萬兩

馮暉為靈州節度使天福中官吏言朔方軍自康福張從賓張希崇相承三正市馬和入糴蕃客賞賜軍州俸祿供事戎仗三司歲支錢六千萬自暉鎮臨巴來皆以已物供用

周彥儒平虜軍節度使知溫之子知溫積貨數百萬天福元年卒慕容顏衍勸彥儒進錢以助國用乃進

錢三萬貫一云十萬貫絹二萬匹布一萬匹金一百兩銀一千兩茶一千五百斤絲錦十萬兩尋授彥儒沂州

刺史

皇甫立為金吾衛上將軍少帝天福八年進助國粟
三千石

周鄭陽蒞為潁州馬步軍教練使家富于財顯德三
年世宗親征淮南至壽春陽進錢二萬以助軍用蓋
倣卜式之意也帝以陽為左監門衛將軍致仕賜襲
衣銀帶

冊府元龜

